

Glieud giuvna paja 15,6 procent damain

Las premias per las cassas da malsauns s'augmentan per 1,2 procent

DA LUCAS DEPLAZES / ANR

■ **La premia en media per l'assicuranza obligatoria da malsauns s'augmenta l'onn 2019 per 1,2 procent. Per il Grischun datti in augment da 2,9 procent. Grondas differenzas tranter ils chantuns.** Alain Berset, il president da la confederaziun ch'ha preschentà ier a Berna a las medias las premias per l'onn proxim, ha punctuà che quellas tegnian era quint da las diversas mesiras decretadas per uonn, sco il Tarmed e talas previsas per ils onns proxims. Ils pretschs per medicaments (generica) duain star en relaziun cun quels da l'exteriur. Pli navant vul il cussegl federal metter en vigur diversas mesiras proponidas dals experts che duain lubir ina reducziun dals custs per var ina milliarda francs. Berset vul impedir intervenziuns medicalas betg necessarias. Ses departament ha introducì in sistem da reporting che duai procurar che las mesiras vegnian er realisadas en la pratica.

In nov model da calculaziun

Il minister da la sanadad publica ha fatg attent a las grondas differenzas tranter ils chantuns che gajan da minus 1,5 procent fin plus 3,6 procent ed a la midada tar la premia standard. Prefereva a l'entschatta la pli gronda part (66%) la premia standard è quella cumpart sa reducida sin actualmain 19%. Var 80 procent da la glieud vul acceptar tschertas restricziuns (model da medi u auters) u in'auta franchisa e pajar damain premias. Quella midada da structura è stada il motiv per il nov model da calculaziun. Senza quest model fissan las premias per creschids s'augmentadas en media sin 477.90 francs il mais. Tenor la nova calculaziun dentant mo sin 372.30 francs. Sin la dumonda sch'ins stoppia quintar l'onn proxim cun in schoc da premias ha Berset fatg attent a l'augment surdimensionà per l'onn current. Las cassas da malsauns disponian uss da considerablas reservas, quai che duai impedir surprisas l'auter onn. Berset ha dentant concedì che las premias vegnian a s'augmentar vinavant pervia dal progress tecnic che lubeschia novas prestaziuns e fatg allusiun al svilup demografic.

Il Grischun sur la media

Per il chantun Grischun han ils calculà in augment da 2,9 procent per ils creschids. Glieud giuvna pa-



Las premias da las cassas da malsauns s'augmentan per pli pauc che tumì.

KEYSTONE

ja tenor la voluntad dal parlament 12,5 procent damain. Cun 87.20 francs pajan ils uffants grischuns traits procent dapli.

Persunas giuvnas pajan damain

L'onn 2016 ha il parlament decidì da distgargiar persunas giuvnas da 19 fin 25 onns tar la cumpensaziun dals ristgs per la mesadad. La raschun è stada da sminuir las premias per las famiglias ed il fatg che quellas persunas van main savens tar il medi e chaschunan uschia damain custs. Per l'onn 2019 cumporta la premia en media 274 francs u 15,6 procent pli pauc che 2018. Quella distgargiada vegn cumpensada cun in augment tar las persunas creschidas dad 8.90 francs.

Infurmaziun

Las cassas da malsauns ston comunicar las novas premias als singuls commembers fin ils 31 d'october 2018. Ils assicurads pon lura desdir il contract ed eleger in'autra cassa da malsauns u far midadas fin ils 30 da november 2018. Mintga cassa è obligada da prender si scadina persuna en l'assicuranza da basa obligatoria (Grundversicherung). Per che la desdida saja valabla ston ins aschuntar a la dumonda da midada ina confermaziun. Sin «www.priminfo.ch» stad a disposiziun a la publicitad in sistem per la calculaziun da las singulas premias. L'Uffizi federal da la sanadad ha installà ina lingia speziala per tgi ch'ha dumondas davart l'assicuranza da malsauns (058 464 88 01).